

## ■ OR DA LA VITA DA LUDMILLA CAHENZLI

# Mandarinas svaneschan

Avant duas emnas èsi capità per l'emprima giada. Jau vegn a chasa, met en cuschina las cumissiuns e vom dabot sin tualetta. Cura ch'jau turn en cuschina, hai sin maisa in mantun paletschas da mandarinas. Jau vom immediat en chombra dals uffants: «Tgi ha mangià las mandarinas?!» Mes uffants ma guardan sco sch'els na savessan betg ch'igl exista in tal fritg.

L'emna passada hai gè ina acziun da mandarinas en stizun. Jau cumpr gist in entir harass. A chasa dost jau immediat il harass en chaminada e cuvr el cun ina gassetta. Jau vom per las autras cumissiuns ch'èn anc en l'auto. Cura ch'jau turn, ma dumonda la figlia pitschna: «Ti mamma, daco hai be paletschas en quest harass en chaminada?» Jau sbrig en chaminada. Incredibel. Jau cur en chombra: «Tgi ha mangià tut questas mandarinas!»

«Jau betg», di la gronda.

«Jau era betg», fa il mesaun.

Las duas fatschas èn uschè innocentas ch'ins po nunpussaiel s'imaginar ch'ils butrichels che tutgan tar questas fatschas van bunamain surora da spir mandarinas.

Stersas èsi stà anc mender. Jau turn a chasa, tschent duas raits da mandarinas sin maisa, ma volv be svelto per dustar la bursa en il truclet ed ina mesa secunda

pli tard èn las duas raits gia stgarpadas e las paletschas sternidas dapertut enturn. Ils trais uffants che sesan en davos maisa ma guardan cun egls gross e la pitschna respunda senza ch'jau avess dumandà: «Jau betg.»

Ma oz sun jau vegnida en chasa cun las mandarinas da davos en – tras la veranda. Jau hai tegnì ellas ferm sut bratsch. Jau aveva extra laschè pachetar ellas en plastic, per che mes uffants – che savuran mandarinas sin kilometers – na sentian betg ellas. Da bass sun jau schluitada en cuschina, sesida be orasum il banc e lura hai stui ir enorm svelto. Jau hai sdrappà davent il plastic, stgarpà la rait e fatg giu la paletscha a l'emprima. Durant mangiar ella hai jau fatg giu la paletscha a la segunda ed en mesa minuta avev'jau mangià tuttas. En quel mument ch'jau strangel giuaden la davosa, curran trais bestias cun egls flammegiants e sgnaffas engurdas en dad isch. «Tgi ha mangià las mandarinas?», sbragian las bestias cun sbava sin bucca.

«Jau betg.»

**Il cudesch pon ins retrair online tar Lia Rumantscha [www.liarumantscha.ch](http://www.liarumantscha.ch) ([http://www.liarumantscha.ch/sites/content/online\\_shop.html?shop:view=details&shop:productid=2830](http://www.liarumantscha.ch/sites/content/online_shop.html?shop:view=details&shop:productid=2830)) u tar mintga libreria**

